



**TEMUI  
PRESIDEN:**

Presiden Halimah (*lima dari kanan*) bergambar bersama pelajar universiti yang sedang menuntut di Kuala Lumpur.

– Foto ihsan  
NURUL HUDA  
NADHIRAH

# Presiden Halimah beramah dengan warga S'pura di KL

PRESIDEN Halimah telah bertemu dengan warga Singapura yang kini belajar atau bekerja di Kuala Lumpur (KL) dalam satu majlis jamuan yang dianjurkan Suruhanjaya Tinggi Singapura semalam.

Ia merupakan sebahagian daripada lawatan kerja dua hari ke KL bermula kelmarin.

Pada hari kedua beliau di sana, Puan Halimah juga telah menghadiri kejohanan golf antara Universiti Malaya (UM) dengan Universiti Nasional Singapura (NUS), dengan kedudukan beliau sebagai canselor NUS.

Pada hari pertama kunjungannya, Puan Halimah telah menghadiri majlis jamuan teh bersama Yang Dipertuan Agong Malaysia, Sultan Muhammad V, di Istana Negara Kuala Lumpur. Laporan lanjut di Muka 2.

# Presiden Halimah: Hubungan S'pura-M'sia kukuh, berteraskan saling rasa hormat

PRESIDEN Halimah Yacob berkata hubungan Singapura-Malaysia telah dibina sejak sekian lama berteraskan rasa saling hormat dan saling percaya antara satu sama lain.

Presiden Halimah berkata demikian semasa berucap di majlis jamuan bersama masyarakat Singapura yang berada di Kuala Lumpur semalam.

Menurutnya hubungan dua hala yang kukuh turut berdasarkan hubungan antara individu yang baik di semua peringkat.

Oleh itu, masyarakat Singapura di Malaysia terus memainkan peranan penting dalam mengukuhkan lagi hubungan dua hala antara dua negara itu, ujarnya.

“Anda semua memainkan peranan yang penting sebagai ‘duta’ Singapura dengan cara anda tersendiri.

“Persaudaraan dan hubungan yang dibina merupakan aspek penting hubungan dua hala Singapura dengan mana-mana negara sekalipun,” kata Puan Halimah.

Majlis jamuan itu merupakan sebahagian lawatan kerja beliau selama dua hari ke Kuala Lumpur sejak kelmarin.

Puan Halimah menambah bahawa sejak pilihan raya Malaysia baru-baru ini, Perdana Menteri, Encik Lee Hsien Loong, dan Timbalan Perdana Menteri, Encik Teo Chee Hean, telah mengadakan lawatan produktif ke Malaysia.

Singapura juga telah menyambut kedatangan beberapa menteri Malaysia ke Singapura dalam tempoh beberapa bulan sebelum ini, kata beliau.

Puan Halimah turut menyentuh tentang hubungan sejarah mendalam antara Singapura dengan Malaysia, yang akan dirakamkan di Galeri Warisan yang dilancarkan Suruhanjaya Tinggi Singapura di sana.

Beliau mengakhiri ucapannya dengan menggalak warga Singapura di Kuala Lumpur untuk terus mengekalkan hubungan rapat sesama sendiri dan mengikuti perkembangan tanah air.

Selain pertemuan dengan masyarakat Singapura, Puan Halimah turut menghadiri kejohanan golf antara Universiti Malaya (UM) dengan Universiti Nasional Singapura (NUS), dengan jawatan beliau sebagai canselor NUS.

Beliau telah diundang canselor UM, Sultan Nazrin Muizzuddin Shah, yang juga merupakan Sultan Perak.

Kejohanan tahunan itu telah diadakan sejak 1968, dengan setiap universiti bergilir menganjurkan kejohanan.

Puan Halimah ditemani suaminya, Encik Mohamed Abdullah Alhabshee, dan pegawai daripada Kementerian Ehwal Luar (MFA), Pejabat Presiden dan NUS.

Beliau pulang semalam.



**GALERI WARISAN:** Presiden Halimah dan Pesuruhjaya Tinggi Singapura ke Malaysia Encik Vanu Gopala Menon (kanan) melancarkan Galeri Warisan yang memaparkan sejarah antara Singapura dengan Malaysia. – Foto MCI